

世宗憲皇帝御製

聖祖廣訓序

書曰每歲孟春道人以木鐸徇於路曰修六禮以節民性明七教以興民德此皆以敦本崇實之道為闢民覺世之模法莫良焉意莫厚焉我

聖祖仁皇帝久道化成德洋恩普仁育萬物義正萬民六十年來宵衣旰食祇期薄海內外興仁講讓革薄從忠共成親遜之風永享昇平之治故

特頒上諭十六條曉諭八旗及直省兵民人等自綱常名教之際以至於畊業作息之間本末精粗公私鉅細凡民情之所

聖諭廣訓

咸甯縣志

卷首

習皆

府慮之所周視爾編氓誠如赤子

聖有謨訓明徵定保萬世守之莫能易也朕繼承大統臨御兆人以

聖祖之心為心以

聖祖之政為政夙夜匪懈率由舊章惟恐小民遵信奉行久而或

怠用申誥誠以示提攜謹將

上諭十六條彙釋至義推行其文共得萬言名曰

聖諭廣訓旁徵遠引往復周詳意取顯明語多直樸無非奉

先志以啟後人使羣黎百姓家諭而戶曉也願爾兵民等仰體

聖祖正德厚生之至意勿視為條教號令之虛文共勉為謹身節

用之庶人盡除夫浮薄蕩凌之陋習則風俗淳厚家室和平在朝廷德化樂觀其成爾後嗣子孫並受其福積善之家必有餘慶其理豈或爽哉

聖諭十六條

第一條敦孝弟以重人倫

第二條篤宗族以昭雍睦

第三條和鄉黨以息爭訟

第四條重農桑以足衣食

第五條尚節儉以惜財用

聖諭廣訓

咸甯縣志

二

第六條隆學校以端士習

第七條黜異端以崇正學

第八條講法律以儆愚頑

第九條明禮讓以厚風俗

第十條務本業以定民志

第十一條訓子弟以禁非為

第十二條息誣告以全善良

第十三條誠窩逃以免株連

第十四條完錢糧以省催科

第十五條聯保甲以弭盜賊

第六條解仇忿以重身命

聖諭第一條

敦孝弟以重人倫

我

聖祖仁皇帝臨御六十一年法

祖尊

親孝思不區

欽定孝經衍義一書衍釋經文義理詳貫無非孝治天下之意故

聖諭十六條首以孝弟開其端朕丕承鴻業追維

往訓推廣立教之思先申孝弟之義用是與爾兵民人等宣示之

聖諭廣訓

咸甯縣志

三

夫孝者天之經地之義民之行也人不知孝父母獨不思
父母愛子之心乎方其未離懷抱不能自哺寒不能自
衣為父母者審聲音察形色笑則為之喜啼則為之憂行
動則跬步不離疾痛則寢食俱廢以養以教至於成人復
為授家室謀生理百計經營心力俱瘁父母之德實同具
天罔極子欲報親恩於萬一自當內盡其心外竭其力謹
身節用以勤服勞以隆孝養毋博奕飲酒毋好勇鬪狠毋
好貨財私妻子縱使儀文未備而誠恐有餘推而廣之如
曾子所謂居處不莊非孝事君不忠非孝莅官不敬非孝
朋友不信非孝戰陣無勇非孝皆孝之分內之事也至若

父有冢子稱曰家督弟有伯兄尊曰家長凡日用出入事

無大小眾子弟皆當咨稟焉飲食必讓語言必順步趨必

徐行坐立必居下凡以明弟道也夫十年以長則兄事之

五年以長則肩隨之况同氣之人乎故不孝與不弟相因

事親與事長並重能為孝子然後能為悌弟能為孝子悌

弟然後在田野為循良之民在行間為忠勇之士爾兵民

亦知為子當孝為弟當悌所患習焉不察致自離於人倫

之外若能痛自愧悔出於心之至誠竭其力之當盡由一

念孝弟積而至於念念皆然勿尚虛文勿略細行勿沽名

而市譽勿勤始而怠終孝弟之道庶克敦矣夫不孝不弟

聖諭廣訓

咸甯縣志

四

國有常刑然顯然之迹刑所能防隱然之地法所難及設
罔知愧悔自陷此僻朕心深為不忍故丁寧告誡庶爾兵
民咸體朕意感發興起各盡子弟之職於戲聖人之德本
於人倫堯舜之出不外孝弟孟子曰人人親其親長其長
而天下平爾兵民其毋視為具文焉

聖諭第二條

篤宗族以昭雍睦

書曰以親九族九族既睦是帝堯首以睦族示教也禮曰

尊祖故敬宗敬示故收族明人道必以睦族為重也夫家

之有宗族猶水之有分派木之有分枝雖遠近異勢疏密

聖祖仁

異形要其本源則一故人之待其宗族也必如身之有四
肢百體務使血脉相通而疴癢相關周禮本此意以教民
著為六行曰孝曰友而繼曰睦誠古今不易之常道也我
聖祖仁皇帝既論爾等敦孝弟以重人倫即繼之曰篤宗族以昭
雍睦蓋宗族由人倫而推雍睦未昭即孝弟有所未盡朕
為爾兵民詳訓之大抵宗族所以不篤者或富者多吝而
無解推之德或貧者多求而生觖望之思或以貴凌賤而
勢利汨其天親或以賤驕人而忿傲施於骨肉或貨財相
競不念祖先之情或意見偶乖頓失宗親之義或偏聽妻
孥之淺識或誤中讒慝之虛詞因而詬詈傾排無所不至

聖諭廣訓

咸甯縣志

五

非惟不知雍睦抑且忘為宗族矣爾兵民獨不思子姓之
眾皆出祖宗一人之身奈何以一人之身分為子姓遽相
視為塗人而不顧哉昔張公藝九世同居江州陳氏七百
口共食凡屬一家一姓當念乃祖乃宗甯厚毋薄甯親毋
疏長幼必以序相洽尊卑必以分相聯喜則相慶以結其
綱繆戚則相憐以通其緩急立家廟以薦蒸嘗設家塾以
課子弟置義田以贍貧乏修族譜以聯疏遠即卑姓寒門
或有未逮亦各隨其力所能為以自篤其親屬誠使一姓
之中秩然藹然父與父言慈子與子言孝兄與兄言友弟
與弟言恭雍睦昭而孝友之行愈敦有司表為仁里君子

稱為義門天下推為望族豈不美哉若以小故而隳宗支
以微嫌而傷親愛以侮慢而遠遜讓之風以偷薄而虧敦
睦之誼古道之不存即為國典所不恕爾兵民其交相勸
勵共體祖宗慈愛之心常切水木本源之念將見親睦之
俗成於一鄉一邑雍和之氣達於薄海內外諸福咸臻太
平有象胥在是矣可不勗歟

聖諭第三條

和鄉黨以息爭訟

古者五族為黨五州為鄉睦婣任恤之教由來尚矣願鄉
黨中生齒日繁比閭相接睚眦小失狎昵微嫌一或不誠

聖諭廣訓

咸甯縣志

六

凌競以起遂至屈辱公庭委身法吏負者自覺無顏勝者
人皆側目以里巷之近而舉動相猜報復相尋何以為安
生業長子孫之計哉

聖祖仁皇帝憫人心之好競思化理之貴滄特布訓於鄉黨曰和
所以息爭訟於未萌也朕欲誠和萬民用是申告爾等以
敦和之道焉詩曰民之失德乾餱以愆言不和之漸起於
細微也易訟之象曰君子以作事謀始言息訟貴絕其端
也是故人有親疏概接之以溫厚事無大小皆處之以謙
冲毋恃富以侮貧毋挾貴以凌賤毋飾智以欺愚毋倚強
以凌弱訟言可以解紛施德不必望報人有不及當以情

恕非意相干當以理遣此既有包荒之度彼必生愧悔之心一朝能忍鄉里稱為善良小忿不爭問黨推其長厚鄉黨之和其益大矣古云非宅是卜惟鄰是卜緩急可恃莫如鄉鄰務使一鄉之中父老子弟聯為一體安樂憂患視同一家農商相資工賈相讓則民與民和訓練相習汛守相助則兵與兵和兵出力以衛民民務養其力民出財以贍兵兵務恤其財則兵與民交相和由是而簞食豆羹爭端不起鼠牙雀角速訟無因豈至結怨耗財廢時失業甚且破產流離以身殉法而不悟哉若夫巨室耆年鄉黨之望膠庠髦士鄉黨之英宜以和輯之風為一方表率而奸

聖諭廣訓

咸甯縣志

七

頑好事之徒或詭計挑唆或橫行嚇詐或貌為洽比以煽誘或假托公言而把持有一於此里閭靡甯鄉論不容國法具在爾兵民所當謹凜者也夫天下者鄉黨之積也爾等誠遵

聖祖之懿訓尚親睦之淳風孝弟因此而益敦宗族因此而益篤里仁為美比戶可封訟息人安延及世世協和徧於萬邦太和蒸於宇宙朕與爾兵民永是賴焉

聖諭第四條

重農桑以足衣食

朕聞養民之本在於衣食農桑者衣食所由出也一夫不

耕或受之饑一女不織或受之寒古者天子親耕后親桑躬為至尊不憚勤勞為天下倡凡為兆姓圖其本也夫衣食之道生於地長於時而聚於力本務所在稍不自力生受其困故勤則男有餘粟女有餘帛不勤則仰不足事父母俯不足畜妻子其理然也彼南北地土雖有高下燥濕之殊然高燥者宜黍稷下濕者宜秔稻食之所出不同其為農事一也樹桑養蠶除江浙四川湖北外餘省多不相宜然植麻種棉或績或紡衣之所出不同其事與樹桑一也願吾民盡力農桑勿好逸惡勞勿始勤終惰勿因天時偶歉而輕棄田園勿慕奇贏倍利而輒改故業苟能重本

聖諭廣訓

咸甯縣志

八

務雖一歲所入公私輪用而外羨餘無幾而日積月累以至身家饒裕子孫世守則利賴無窮不然而舍本逐末豈能若是之綿遠乎至爾兵隸在戎伍不事農桑試思月有分給之餉倉有支放之米皆百姓輸納以散給爾等各贍身家一絲一粒莫不出自農桑爾等既享其利當彼此相安多方捍衛使農桑俱得盡力爾輩衣食永遠不匱則亦重有賴焉若地方文武官僚俱有勸課之責勿奪民時勿妨民事浮惰者懲之勤苦者勞之務使野無曠土邑無游民農無舍其耒耜婦無休其蠶織卽至山澤園圃之利雞豚狗彘之畜亦皆養之有道取之有時以佐農桑之不逮

庶幾克勤本業而衣食之源溥矣所慮年穀豐登或忽於儲蓄布帛充贖或侈於費用不儉之弊與不勤等甚且貴金玉而忽菽粟工文繡而廢蠶桑相率爲紛華靡麗之習尤爾兵民所當深戒者也自古盛王之世老者衣帛食肉黎民不饑不寒享庶富之盛而致教化之興其道胥由乎此

聖祖仁皇帝念切民依嘗刊耕織圖頒行中外所以敦本阜民者甚至朕仰惟

聖諭念民事之至重廣爲詮解勸爾等力於本務余一人衣租食稅願與天下共飽煖也

聖諭廣訓

咸甯縣志

九

聖諭第五條

尚節儉以惜財用

人生不能一日而無用卽不可一日而無財然必留有餘之財而後可供不時之用故節儉尚焉夫財猶水也節儉猶水之蓄也水之流不蓄則一洩無餘而水立涸矣財之流不節則用之無度而財立匱矣我

聖祖仁皇帝躬行節儉爲天下先休養生息海內殷富猶兢兢以惜財用示訓蓋自古民風皆貴乎勤儉然勤而不儉則十夫之力不足供一夫之用積歲所藏不足供一日之需其害爲更甚也夫兵丁錢糧有一定之數乃不知撙節衣好

鮮麗食求甘美一月費數月之糧甚至稱貸以遂其欲子母相權日復一日債深累重饑寒不免農民當豐收之年倉箱充實本可積蓄乃酬酢往來率多浮費遂至空虛夫豐年尚至空虛荒歉必至窮困亦其勢然也似此之人國家未嘗減其一日之糧天地未嘗不與以自然之利究至啼饑號寒困苦無告者皆不節儉所致更或祖宗勤苦儉約日積月累以致充裕子孫承其遺業不知効力艱難任意奢侈誇耀里黨稍不如人卽以爲恥曾不轉盼遺產立盡無以自存求如貧者之子孫並不可得於是寡廉鮮恥靡所不至弱者餓殍溝壑強者作惡犯刑不儉之害一至於此易曰不節若則嗟若蓋言始不節儉必至嗟悔也爾

聖諭廣訓

咸甯縣志

十

兵民當凜遵

聖諭釋思不忘爲兵者知月糧有定與其至不足而冀格外之賞孰若留有餘以待可繼之糧爲民者知豐歉無常與其但顧朝夕知貧窶之可憂孰若留貯將來爲水旱之有備大抵儉爲美德甯以固陋貽譏禮貴得中勿以驕盈致敗衣服不可過華飲食不可無節冠昏喪祭各安本分房屋器具務取素樸卽歲時伏臘斗酒娛賓從俗從宜歸於約省爲天地惜物力爲朝廷惜恩膏爲祖宗惜往日之勤勞爲子孫惜後來之福澤自此富者不至於貧貧者可至於富

安居樂業含哺鼓腹以副朕臯俗誠民之至意孝經有曰
謹身節用以養父母此庶人之孝也爾兵民其身體而力
行之

聖諭第六條

隆學校以端士習

古者家有塾黨有庠州有序國有學固無人不在此所教之
中專其督率之地董以師儒之官所以成人材而厚風俗
合秀頑強懦使之歸於一致也

聖祖仁皇帝壽考作人特隆學校凡所以養士之恩教士之法無
不備至蓋以士為四民之首人之所以待士者重則士之

聖諭廣訓

咸甯縣志

士

所以自待者益不可輕士習端而後鄉黨視為儀型風俗
由之表率務令以孝弟為本材能為末器識為先文藝為
後所讀者皆正書所交者皆正士確然於禮義之可守惕
然於廉恥之當存惟恐立身一敗致玷宮墻惟恐名譽雖
成負慚衾影如是斯可以為士否或躁競功利干犯名教
習乎異端曲學而不知大道驚乎放言高論而不事躬行
問其名則是考其實則非矣昔胡瑗為教授學者濟濟有
成文翁治蜀中子弟由是大化故廣文一官朕特飭吏部
悉以孝廉明經補用凡以為興賢育才化民成俗計也然
學校之隆而在司教者有整齊嚴肅之規尤在為士者有

愛惜身名之意士品果端而後發為文章非空虛之論見
之施為非浮薄之行在野不愧名儒者在國即為良臣所
係顧不重哉至於爾兵民恐不知學校之為重且以為與
爾等無與不思身雖不列於庠序性豈自外於倫常孟子
曰謹庠序之教申之以孝弟之義又曰人倫明於上小民
親於下則學校不獨所以教士兼所以教民若燬宮之中
文武並列雖經義韜略所習者不同而入孝出弟人人所
當共由也士農不異業力田者悉能敦本務實則農亦士
也兵民無異學即戎者皆知敬長愛親則兵亦士也然則
庠序者非爾兵民所當隆重者乎端人正士者非爾兵民

聖諭廣訓

咸甯縣志

士

所當則效者乎孰不有君臣父子之倫孰不有仁義禮智
之性勿謂學校之設止以為士各宜以善相勸以過相規
向風慕義勉為良善則氓之蚩蚩亦可以禮義為耕耘
越武夫亦可以詩書為甲冑一道同風之盛將復見於今
日矣

聖諭第七條

黜異端以崇正學

朕惟欲厚風俗先正人心欲正人心先端學術夫人受天
地之中以生惟此倫常日用之道為智愚之所共由索隱
行怪聖賢不取易言蒙以養正聖功以之書言無偏無陂

無反無側王道以之聖功王道悉本正學至於非聖之書不經之典驚世駭俗紛紛藉藉起而爲民物之蠹者皆爲異端所宜屏絕凡爾兵民誠謹澹樸者固多間或迷於他岐以無知而罹罪戾朕甚憫之自古三教流傳儒宗而外厥有仙釋朱子曰釋氏之教都不管天地四方只是理會一個心老氏之教只是要存得一個神氣此朱子持平之言可知釋道之本指矣自游食無藉之輩陰竊其名以壞其術大率假災祥禍福之事以售其誕幻無稽之說始則誘取資財以圖肥己漸至男女混淆聚衆爲燒香之會農工廢業相逢多詭恠之人又其甚者奸回邪慝竄伏其中

聖諭廣訓

咸甯縣志

三

樹黨結盟夜聚曉散干名犯義惑世誣民及一旦發覺律捕株連身陷囹圄累及妻子教主已爲罪魁福緣且爲禍本如白蓮聞香等教皆前車之鑒也又如西洋教宗天主亦屬不經因其人通曉歷數故國家用之爾等不可不知也夫左道惑衆律所不宥師巫邪術邦有常刑朝廷立法之意無非禁民爲非導民爲善黜邪崇正去危就安爾兵民以父母之身生太平無事之日衣食有賴俯仰無憂而顧昧恆性而即匪彝犯王章而干國憲不亦愚之甚哉我聖祖仁皇帝漸民以仁摩民以義藝極陳常煌煌大訓所以爲世道人心計者至深遠矣爾兵民亦仰體

聖心祇遵

聖教擅斥異端直如盜賊水火且水火盜賊害止及身異端之害害及人心心之本體有正無邪苟有主持自然不惑將見品行端方諸邪不能勝正家庭和順週難可以成祥事親孝事君忠盡人事者即足以集天庥不求非分不侬非爲敦本業者即可以迓神慶爾服爾耕爾講爾武安布帛菽粟之常遵蕩平正直之化則異端不待驅而自息矣

聖諭第八條

講法律以儆愚頑

法律者帝王不得已而用之也法有深意律本人情明其

聖諭廣訓

咸甯縣志

四

意違其情則囹圄可空訟獄可息故懲創於已然不如警惕於未然之爲得也周禮州長黨正族師皆於月吉屬其民而讀法大司寇懸象刑之法於象魏使萬民觀之知所向方今國家酌定律例委曲詳明昭示兵民俾各凜成憲遠於罪戾意甚厚也

聖祖仁皇帝深仁厚澤洽於兆民而於刑罰尤惓惓致意朕臨御以來體好生之德施欽恤之恩屢頒赦款詳審爰書庶幾大化翔洽刑期無刑又念爾爲民者生長草野習於顛蒙爲兵者身隸戎行易逞強悍每至誤觸王章重干憲典因之特申訓誡警醒愚頑爾等幸際昇平休養生息均宜循

分守禮以優游於化日舒長之世平居將頒行法律條分
縷析講明意義見法知懼觀律懷刑如知不孝不弟之律
自不敢爲蔑倫亂紀之行知剛狠攘奪之律自不敢逞慕
凌強暴之氣知奸淫盜竊之律自有以遏其邪僻之心知
越訴誣告之律自有以革其健訟之習蓋法律千條萬緒
不過準情度理天理人情心所同具心存於情理之中身
必不陷於法律之內且爾兵民性縱愚頑或不能通曉理
義未必不愛惜身家試思一蹈法網百苦備嘗與其宛轉
呼號思避罪於箠楚之下何如洗心滌慮早悔過於清夜
之間與其傾貲蕩產求減毫末而國法究不能逃何如改

聖諭廣訓

咸甯縣志

五

惡遷善不犯科條而身家可以長保倘不自警省偶罹於
法上辱父母下累妻孥鄉黨不我容宗族不我齒卽或邀
恩倖免而身敗行虧已不足比於人數追悔前非豈不晚
哉朕聞居家之道爲善最樂保身之策安分爲先勿以惡
小可爲有一惡卽有一法以相治勿以罪輕可玩有一罪
卽有一律以相懲惟時時以三尺自凜人人以五刑相規
懼法自不犯法畏刑自可免刑匪僻潛消爭競不作愚者
盡化爲智頑者悉變爲良民樂田疇兵安營伍用臻刑措
之治不難矣

聖諭第九條

明禮讓以厚風俗

漢儒有曰凡民函五常之性而其剛柔緩急音聲不同繁
水土之風氣故謂之風好惡取舍動靜無恆隨厥情欲故
謂之俗其間滄海厚薄難以強同奢儉質文不能一致是
以聖人制爲禮以齊之孔子曰安上治民莫善於禮蓋禮
爲天地之經萬物之序其體至大其用至廣道德仁義非
禮不成尊卑貴賤非禮不定冠昏喪祭非禮不備郊廟燕
享非禮不行是知禮也者風俗之原也然禮之用貴於和
而禮之實存乎讓子曰能以禮讓爲國乎何有又曰先之
以禮讓而民不爭使徒習乎繁文縟節而無實意以將之

聖諭廣訓

咸甯縣志

六

則所謂禮者適足以表其浮僞滋其文飾矣夫禮之節文
爾兵民或未盡習禮之實意爾兵民皆所自具卽如事父
母則當孝養事長上則當恭順夫婦之有倡隨兄弟之有
友愛朋友之有信義親族之有款洽此卽爾心自有之禮
讓不待外求而得者也誠能和以處衆卑以自牧在家庭
而父子兄弟底於肅雍在鄉黨而長幼老弱歸於親睦毋
犯監凌之戒毋蹈縱恣之愆毋肆一念之貪遂成攘奪毋
逞一時之忿致起紛爭毋因貧富異形有輕視之意毋見
強弱異勢起迫脅之心各戒澆漓共歸長厚則循於禮者
無悖行敦於讓者無兢心藹然有恩秩然有義黨序術序

相率爲俊良農工商賈不失爲涓樸卽韜鈴介冑之士亦被服禮樂詩書以潛消其剽悍桀驁豈非太和之氣大順之徵乎書曰謙受益滿招損古語又曰終身讓路不枉百步終身讓畔不失一段可知禮讓之有得而無失也如此朕願爾兵民等聆

聖祖之訓而返求之於心身爾能和其心以待人則不和者自化爾能平其心以接物則不平者亦平一人倡之衆人從之一家行之一里效之由近以及於遠由勉以至於安漸仁摩義俗厚風淳庶不負醇醇誥誡之意哉

聖諭第十條

聖諭廣訓

咸甯縣志

七

務本業以定民志

朕惟上天生民必各付一業使爲立身之本故人之生雖智愚不同強弱異等莫不擇一業以自處居此業者皆有本分當爲之事藉以有利於身藉以有用於世幼而習焉長而安焉不見異物而遷焉此孟子之所謂恒產卽

聖祖仁皇帝之所謂本業也維茲本業實爲先務凡爲士農爲工

商以及軍伍業雖不同而務所當務則同也夫身之所習爲業心之所向爲志所習既專則所向自定書曰功崇惟志業廣惟勤益業與志本相須而成也但恐日久而生厭舍舊而圖新或爲浮言所動或因際遇未通一念游移半

途而廢作非分之營求生意外之妄想究之朝夕營營不恆其德資生寡策歷久無成而志遂以荒而業遂以廢矣夫業每荒於嬉而必精於勤志貴奮於始而尤勵於終朕樂觀爾之成不忍見爾之廢也爲士者謹身修行矻矻窮年服習詩書敦崇禮讓退爲有本之學進爲有用之才爲農者春耕秋歛不失其時搏節愛養不愆於度先時以備水旱如期而輸稅糧使地無餘利人無餘力工則審四時易而退各得其所務體公平勿蹈欺詐若夫身列行陣行陣卽其業也弓馬騎射操練之必精步伐止齊演習之必

聖諭廣訓

咸甯縣志

式

熟屯田則事墾闢守汛則嚴刁斗備邊則險要之宜知防海則風濤之宜悉庶幾無負本業矣夫天下無易成之業而亦無不可成之業各守乃業則業無不成各安其志則志無旁鶩毋相侵擾毋敢怠荒甯習於勤勿貪夫逸樂甯安於樸守勿事乎紛華熙熙然士食舊德農服先疇工利器用商通貨財兵資捍衛各盡乃職各世其業上以繼祖宗之傳下以綿子孫之緒富庶豐亨遊於光天化日之下仰答

聖祖誥誡之殷懷以克副朕休養之至意願不共享其福歟

聖諭第十一條

訓子弟以禁非爲

從來教萬民訓子弟黨正族師月吉誦法歲時校比師出
行役則合卒伍而簡兵器朝夕誥誠人知自愛不敢偶鍾
於非休哉何風之隆歟我

聖祖仁皇帝臨御六十一年弘保赤之仁廣教家之治深思厚澤
休養生息以至於今朕繼承大統仰體

聖祖子思元元之心無日不以爾百姓爲念尤無日不以爾百姓
之子弟爲念也人生十年曰幼學二十曰弱冠血氣未定
知識漸開訓道懲戒之方莫切於此大凡子弟之率不謹
皆由父兄之教不先所恃爲父兄者啟其德性遏其邪心

聖諭廣訓

咸甯縣志

九

廣其器識謹其嗜好至於愛親敬長之念人所固有爾父
兄誠能明示其訓俾知父子有親君臣有義夫婦有別長
幼有序朋友有信以端其本則大倫明而干紀犯分之咎
自鮮矣夫士農工商各有傳業軍世之家世習技勇其人
之淑慝邪正必自爲子弟之日始語云少成若天性習慣
成自然民間非爲之事漸漬成風或游手好閒博奕飲酒
或結納匪類放辟邪侈往往陷溺而不悟甚者罹法網犯
刑章爾爲父兄者獨能晏然而已乎與其追悔於事後孰
若嚴訓於平時蓋行莫重於孝弟力田心必存乎禮義廉
恥可模可範以身教之耳提面命以言教之使子弟見聞

日熟循蹈規矩之中久之心地清良行止端重可以寡過

而保家即可以進德而成材也且庭訓素嫻子弟克肖則
國家賓興令典自致顯揚旣光大爾門閭又垂裕爾後昆
父兄俱與有榮焉即使愚魯不敏而服教安化刑辱不及
於厥躬鄉黨咸稱爲良士一家之休祥孰大於是況今日
之子弟又爲將來之父兄積善相承誨迪不倦將見戶興
禮讓人敦孝義自通都大邑以至窮鄉僻壤太平之象興
國俱長庶不虛朕殷殷期勗之至意矣夫好善則閭閻子
弟可致尊榮苟不善則公卿子弟流爲貧賤義方之教切
磋之功可不豫嚴於蒙穉之年乎爾兵民其敬聽之毋忽

聖諭廣訓

咸甯縣志

十

聖諭第十二條

息誣告以全善良

國家之立法所以懲不善而儆無良豈反爲奸民開訐告
之路而令善良受傾陷之害哉夫人必有切膚之冤非可
以理遣情恕者於是鳴於官以求申理此告之所由來也
乃有奸宄不法之徒好事舞文陰謀肆毒或捏虛以成實
或借徑以生波或設計以報宿嫌或移禍以卸己罪顛倒
是非混淆曲直往往飾沉寃負痛之詞逞兇影捕風之術
更有教唆詞訟者以刀筆爲生涯視訟獄爲兒戲深文以
冀其巧中搆讒而圖其重酬鄉里畏之名曰訟師因而朋

比協謀黨惡互證有司或一時受蔽致使善良之輩不能
自白桁楊在前箠楚在後鍛鍊之下何求不得縱至事明
冤雪而拖累困苦小則廢時失業大則蕩產破家善良之
被誣可憫而冤頑之誣善良尤可痛恨也

聖祖仁皇帝矜恤下民重懲其弊

頒示訓諭有曰息誣告以全善良夫誣告有反坐之條令甲煌煌
乃敢作奸犯科而不畏者利慾薰心澆薄成性方且恣其
含沙之毒僥倖於法網之寬殊不知無情之辭一經審察
莫可逃避造孽以傾人究之布阱以自陷亦何利之有嘗
聞古人或認牛而不辯或奪禾而不爭卒開愧悔之誠翻

聖諭廣訓

咸甯縣志

廿

成禮讓之俗若斯之風誠可嘉尚爾兵民所當景效焉且
尋繹

聖諭不曰禁而曰息謂與其治之以法不如感之使自化也蓋官
吏之見聞或疎疎則猶煩揣測鄉鄰之耳目最近近則素
所稔知爲之抉其根株窮其黨類出於無心者緩語以曉
之成於有意者危言以誡之彼善良之家素行足以質之
里閭而無愧而誣告之人言辭既非情實迫於公論則不
敢誣揆諸本心亦不忍誣凡前此之陰謀秘計一旦悚然
改悔如水消霧釋兵不誣兵而兵之善良者全民不誣民
而民之善良者全兵民不相爲誣而兵民舉全不至赴官

終訟兩造俱傷庶幾從風慕義胥天下而歸於無訟豈不
休哉尚其咸諭而凜遵焉

聖諭第十三條

誠窩逃以免株連

朕撫臨億兆合四海爲一家聯萬姓爲一體中外旗民本
無異視第以國初定制八旗人員在內則拱衛京師在外
則駐防各省如有不奉使令潛往他鄉者卽爲逃人例有
嚴禁逃人所至之地兵民人等不行覺察擅自容留者罪
並及之按匿逃情繁大約不外兩端凡在逃之人意氣言
辭必多巧飾爾等或受其欺妄不辯爲逃人而率意容留

聖諭廣訓

咸甯縣志

廿

者有之或利其財物明知爲逃人而通同隱匿者有之夫
至僕之間乃大義所在逃人皆至蔑義窩逃者黨不義而
藐王章逃者特匿者以爲之蔽也法安得恕故順治五年
之例窩逃者問擬大辟並籍其家鄰佑十家等皆徙邊遠
康熙十五年定例凡窩逃之正犯流徙尚陽堡兩鄰十家
長罪止杖徒此皆我

聖祖皇帝矜恤愚民罪疑惟輕故改從寬典也又屢年恩詔將逃
人事件概行赦免國家施法外之仁寬督捕之罰無非欲
爾兵民草溥從忠遷善改惡使蓬門華戶出入優游共享
太平無事之福爾兵民等其仰體

聖祖告誡之慈懷與朕諄諭之至意謹身率教循禮奉公不交游

手無藉之徒不為行險僥倖之事毋徇私情而干國憲毋貪微利而忘身家如此則井里晏然四鄰安堵胥吏不擾雞犬無驚而國家刑期無刑之化亦可以觀厥成矣倘因法網既寬復蹈故轍營私受賄藏惡養奸自取其辜何能曲宥况夫逃竄之人性既冥頑又無生理所為種種不端大而盜賊小而賭博一經發覺皆犯科條容留之家又安能脫然事外不罹罪譴耶周易曰比之匪人不亦傷乎晏子曰居必擇鄰所以避患也可知奸猾浮蕩之徒皆足為善良之累朕願爾等父誡其子兄誡其弟隊長誡其行伍

聖諭廣訓

咸甯縣志

三

鄉約誡其比閭祇奉訓辭各遠非義則地方甯謐俗厚風淳又何患株連之偶及哉

聖諭第十四條

完錢糧以省催科

自昔盡野分州任土作貢而賦稅以興凡國之五禮百度輸用出入皆賴焉此君所必需於民下所宜供於上古今通義未之或改且以制官祿所以治我民以給兵餉所以衛我民以備荒歉所以養我民取諸天下還為天下用之人主之倉廩府庫豈厲民而以自養耶我朝自定鼎以來賦額悉準經制且檟徵私派一切革除未嘗絲毫多取於

民溯我

聖祖仁皇帝深恩厚澤養斯民六十餘年時以閭閻豐裕為念所蠲免錢糧何止百千萬億遐邇之需被固已洵肌浹髓矣夫緩徵薄斂加惠元元君之德也以下奉上先公後私民之職也屬在兵民宜喻此意勿惰而嬉荒其本業勿奢而費耗其貲財勿迨巡觀望冀邀賜復之殊恩勿轉委輸將致被豪猾之中飽依限而納毋待追呼然後以其所餘養父母畢婚嫁給朝夕供伏臘縣庭有卧治之官村巷無夜呼之吏俯仰無累妻孥晏然其為安樂莫踰於此倘不知國課之當重國法之難寬或有意抗違或任情遲緩有

聖諭廣訓

咸甯縣志

三

司迫奏銷之限不得不嚴追比胥役受鞭撻之苦不得不肆誅求剝啄叩門多方需索無名之費或反浮於應納之數而究竟所未完者仍不能為爾寬貸不知何樂而為此夫供胥役之侵漁易若輸朝廷之正供為抗糧之頑戶曷若為守法之良民人雖至愚亦必知之况乎上好仁而下好義情屬一體爾試思廟堂之上所日夜憂勞者在於民事水溢則為防堤旱魃則為虔禱蝗蝻則為撲滅幸不成災則爾享其利不幸成災則又為之蠲租為之賑濟如此而為民者尚忍違賦以悞國需問之於心亦何以自安譬人子於父母分產授業以後必服勞奉養庶盡厥職乃父

母恩勤顧復不遺餘力而爲子者自私其財缺甘旨而違色養尚得謂之人子乎朕用是諄諄告誡但願爾兵民上念軍國下念身家外有效忠之名內受安享之實官不煩而吏不擾何樂如之爾兵民清夜自思其感體朕意

聖諭第十五條

聯保甲以弭盜賊

從來安民在於弭盜摘發守禦之法必當先事而爲之備故緝捕有賞疎縱有罰諱盜有禁違限有條而最善者莫如保甲十家爲甲十甲爲保甲有長保有正設立簿册交察互警此卽井田守望之遺制所以

聖諭廣訓

咸甯縣志

其

聖祖仁皇帝上諭曰聯保甲以弭盜賊誠欲使四海九州閭閻安堵澄本清源

聖慮實爲周切矣第恐遵行既久遂至因循吏則徒稽戶籍民則

僅置門牌而於聯比糾察之法未見實心奉行以至勾引窩藏之弊種種而生鄰舍失事竟有如秦越之相視富豪被劫反指爲悖出之當然甚且假公濟私藉盤詰之虛名滋無厭之誅求汛防因而騷擾胥役緣以生奸有保甲之名無保甲之實有保甲之累無保甲之益此盜賊之所以難弭也夫良法之有利於民在奉行之必求其實嗣後城市鄉村嚴行保甲每處各自分保每保各統十甲城以坊

分鄉以圖別排鄰比戶互相防閑一甲之中巨室大戶僮佃多至數百此內良石本戶自有責任若一廬一舍之散布村落者有業無業或良或石里正保正得以微窺於平素一出一入得以隱察其行踪遇有不務恆業羣飲聚博鬪鷄走狗夜集曉散以及履歷不明踪跡可疑者皆立爲糾舉不許暫容甲內其荒原古廟闢肆叢祠尤易藏奸更宜加謹防察至汛地兵丁務必晝夜巡邏一體查詰毋借端生事毋挾仇陷害毋受賄賂而徇縱毋惜情面而姑容協力同心輪流分派則盜賊無容身之地軍民享安靜之樂矣查昔人禦盜之法村置一樓樓設一鼓一家有失擊

聖諭廣訓

咸甯縣志

其

鼓爲號警起而守其要害盜賊將安所逃所謂寓兵法於保甲中也若夫江海出沒之區有未可以保甲行者舟楫往來烙號聯解彼此互相稽查匪類亦難藏匿皆在實心奉行先事而爲之備若視爲具文怠忽從事至於被盜者失財連坐者受累不惟負朕息盜安民之至意亦甚非爾等保身保家之良策也

聖諭第十六條

解警悉以重身命

朕惟人道莫大於守身民之有身所以務本力田養父母而畜妻子兵之有身所以嫻習技勇資捍衛以報朝廷身

爲有用之身則皆當自愛乃生人氣質之偏不能變化往
往血氣用事至一發而不可遏激怒崇朝竟成莫解互相
報復兩敗俱傷其起甚微而爲害甚大不念愛善抵罪一
定之律雖國家法網甚寬亦不能爲殺人者施法外之仁

聖祖仁皇帝訓諭十六條而終之以重身命誠哀矜憐憫之至意

也夫天地以好生爲心而憫惻之倫不自願惜人君以愛
養爲政而蚩蚩之衆每至輕生非釁起於夙昔之仇卽禍
生於一朝之忿強者恃勢力之剛殺人亡命弱者希抵賞
之罪赴水投繯忿以成仇仇而益忿原其致此之由固非
一端而兵民所易犯者尤多於縱酒蓋酒之爲物能亂人

聖諭廣訓

威甯縣志

七

心志使失其故常或賓主酬酢始以合歡而俱入醉鄉則
一言不合至操刀而相向或睚眦之怨本可冰釋及酒酣
耳熱則一發難忍若不共之深仇每見刑曹命案相傷於
酒後者十有五六噫置身縲紲家破人亡甚至累及妻孥
禍延鄉黨而後拊心自悼悔何及矣自今以往皆當敬聆

聖諭時時提醒思仇與身孰重毋追既往之仇而昧將來之患思

忿與命孰輕毋快目前之忿而貽事後之悔縱人或以非
禮相加似難含忍然一念夫身命攸關則從父兄訓誨聽
親友調和無不情恕理遣至酒之爲害尤宜深戒古之人
旣立之監或佐之史蓋惟恐載號載吹亂邊豆而起爭端

也其可沉湎荒腴致陷身於刑戮乎語有之忍之斯須乃
全爾軀故解去仇忿則全身保家之道胥在於此養其和
平消其亢戾不待排難解紛而凌競之習自然悉化何其
風之醅也孔子曰忿思難孟子謂橫逆猶是此亦妄人也
已矣聖賢之遺訓與

聖祖仁皇帝之明諭固千古同揆也凡爾兵民凜遵毋忽則閭閻

相保營伍相安下以承家上以報國優游盛世共躋仁壽
之域非解仇忿之明效與

聖諭廣訓

威甯縣志

其

咸甯舊徵誌概

維咸楚隘名區縣分翼軫武昌屬郡地接江蒲金城鞏乎
四鄉延袤且以百里其間山川秀躍人物祥符蘋溪傳北
海之雄文潛石留稚川之仙籍山名相嶺人傑由於地靈
水號帶河勢流夾平腋瀟眺梅坡而念丹陽懿範步書墓
而仰文簡元風至若孟機之清憲忠定之諫垣雲漢為昭
日星共擢緬懷往蹟幸際今休然玉麗山輝珠溜川媚必
紀載資於博物方著作協夫同文獨念華故伊邇稽古維
艱即家有藏書未免苔封綠字及匱湮方策奚由雲護金
滕欲校圖章之罔闕實求文獻以可徵用詢故老傳聞無

咸甯縣志

卷首 舊序

嫌夫珠遺滄海確拔先民典則祈合夫日燦中天藉是搜
羅必悉庶幾考核宜詳 輔民牧攸寄邑宰是司技慚刻鶩
才愧雕蟲適承 憲輯

王會之圖特飭郡守方輿之志采故本以續新筌於今為烈
索前徵以彰軼事曠古莫違時移而物未改作述恒關聖
明古往而今自來守待應分先後雖方言野史明若著占
即家乘稗官燎如犀照凡我先達士夫崇文碩逸世代藏
優枉秘不妨示我考求前人給有囊珍尤望資予采緝先
型是式後學有徵夫金山淦水之區皆人文淵藪而鐘蓋
掛榜之地盡理學宗工注望同人欣懷共事咸標繡虎之

心裁各擅雕龍之巧莖冰紋製錦用能藻繪於縹緗玉屑
分矚豈徒工飭於鉛槧法太青之紀事石室堪傳傲文毅
之遺書瑯函特勅釋疑存信考古即以證今就簡芟繁雜
風直能訓俗方物既多載乘太史具有明徵惟冀士林之
編纂上備

彤瑄之撰修敢布名卿聿勳盛典

昔

康熙乙巳四年季秋月

咸甯令何廷輔識

咸甯縣志舊序

夫居今而卓然具千古之識能斷然衡千古之事者誠賴

咸甯縣志

卷 舊序

二

文有傳事獻有傳人也文獻傳而故典備故典備而一代
之史彰矣史以實錄傳世

國書也國書之成成於郡邑之誌夫邑統於郡郡統於省省

統於

京師斯大一統者

聖天子車書全盛之模而守庶邦者牧伯師尹宜化中外之職
也則自省郡而下凡屬邑之隸在附庸者其於誌書不可
不詳具焉故一邑之誌一邑之書也所係者重必參以野
史方言之紀載故老隱碩之傳聞輯而為書徵信也信則
公公則於邑為誌於

國爲史誌之與史不其相表裏乎翰於甲辰秋九月奉

命任咸事方兢兢飲冰茹蘗脩政和民與咸之薦紳士庶相

安於忠孝廉義風土產物之常甫及一井而一邑之中庶

務交脩百廢具舉習於農者樂其田疇習於教者澤以詩

書翰得持其以咸治咸者上報

聖天子此固宰職然也退食之暇取邑之往誌讀之覺宋元以

前有傳人因有傳事惟明萬曆乙巳而後暨我重熙累洽

之世凡六十餘年之事蹟畧焉未著翰采之司牧是可默

默已乎夫十室雖小邑其間山川排設有自然之輿形也

士習民風有自然之禮教也人官物曲有自然之輔相也

咸甯縣志

卷 舊序

三

至於戶口田賦又有自然之生聚自然之輻輳也守是土

者本自然之心行自然之政則一邑自然之志胡不可博

稽而纂輯焉翰心竊向慕之而仍未敢私附編瑄之役也

適奉 上臺飭續三楚全誌徵書於咸則向以纂輯爲心

者今且以纂輯視事矣翰方幸成其書執以上之 太守

樂觀郡史之明備也呈之 方伯樂觀會典之藩宣也達

之 臺輔樂觀邦憲之屏翰也獻之

彤廷樂觀起居之著作館閣之編撰穆穆皇皇成

國朝一統之史乘也翰躬逢其盛慶何如耶由是殫思竭力

謀之載籍考之見聞得邑中薦紳先生及諸弟子員集議

公堂出其邑誌互相參校期於弗謬每錄一事必錄其事

之信而無疑甄一人必甄其人之名而當實如前志之當

因者因之非以臨沿狗舊跡也前誌之未備者備之非以

增飾炫新華也閱三旬而成編登之梨棗以示信從將前

可以監往後可以彰來雖職方所掌其貢採固有成憲而

都邑所記其參考俱係公評則咸之有誌無徒曰一邑之

書也更可出而公於世以爲天下後世之書翰猶得俟諸

有識者訂千古之同心焉

康熙乙巳

咸甯縣志

卷 舊序

四

余栖遲咸學宮可謂星霜飽歷廡楹之下山川風土相習

而深學數武面相山則執政當世故墟也遠挹乎蒼蒼鐘

臺白望則北海父子書簾舊址也唐宋名公鉅卿留遺在

目而元明兩代忠孝偉望猶其近觀抵掌諸士懷古肝衡

未嘗不感慨夫邑志之詳而可攷也春秋百國各有書蕭

何入關盡收圖籍丙吉東曹考業邊瑣由此觀之古人致

治圖籍之功斷未容泯志可昔有而今無與僉云咸當江

蒲地未割一鎮也元祐間始益以縣在宋元有志至明天

順時獲學博伍君手更編輯洎司農孟公復續編於萬曆

乙巳首尾百年賢有司得以居今知昔斟酌物產裁制壤

則相風土順天時志所由作也兵燹散佚留心者鮮余聞此方悵然才不逮伍君第願執鞭弭以俟君子之至斯也蓋六年於茲適值闕京何侯奉

簡書昨甲辰臨越今乙巳慨然首商邑志與予約徵邑髦士刻期續編積三月志成較詳於前乙巳備同於昔之伍君而相成此不朽者甚盛典也予坐卧庶楹日支頤相山博綜於唐宋元明之間俯仰於車書一統人文物產之麗庶無負此星霜云云例有序余不敏願僭以書諸左

康熙乙巳

咸甯縣儒學訓導胡玗撰

邑志舊序

咸甯縣志

卷 舊序

五

天文有分野地輿有疆域封建之制變為郡縣其間或百里或數百里阻山距河語言物類懸殊不一豈非天地有自然之排設而隨時因革人特為之輔相裁成者與山川之氣民物生焉有樸有僞有良有悍而土之肥瘠俗之善淫靡不隨氣化以相感非有廉明之吏與端謹之士夫以倡明教化維持風習則樸者順者皆不可恃以為理而况望其有忠孝節義之士孕育而起者乎此人之所以與天地參也邑有人而邑治猶之國有人而國治天下有人而天下治也賢人者衆人之則也前人者後人之師也文獻不足邑典闕如其何以矩矱百世開風興起也與此志之

不可已也咸志始於天順間學博臨川伍君勗之繼前志年間邑侯譚元炳王公領之而先達邨先生義浩孟公繼緝成卷余生也晚不得觀其人不得稽其續滅沒數十

年縱父老傳聞疑信相半其間士之仁者大夫之賢者愚夫愚婦之節烈名儒碩彥之理學才臣傑士之忠義勲名聞不乏人而竟無傳焉主持風教誰之責與咸之民樸魯而耕耨故兵凶不至於走險咸之士懿謹而詩書故矜肘不及於城闕咸之宦溫儉而鮮驕侈故科名間作不敢為墨吏所由然者星川之氣鍾之者和受之者正而又有良牧休養甄育于其間風純俗美殆斯人之力也甚矣志之

咸甯縣志

卷 舊序

六

不可已也美而弗彰孰為之前盛而弗傳孰為之後故千百年之聖踪賢跡四海九州之名山大川搜之與圖燦若列星而況在戶牖里巷之間乎邑之有志以彰前也以訓後也以示凡為吏者不可不聚生齒而慎賦役而凡為世祿者不可不尚忠孝而羞淫侈也此脩誌之義也余有意未逮即投郡令仕優則學竊自勉焉乃吾翁走書饒陽盛稱邑侯何公新任廉明而惠邑人感之以修輯咸志請序將不以簿書吏視予也而曷敢辭焉若夫著述之詳畧是非之真贗三代遺直父老存焉去浮就實討古論今立不朽之言昭垂典則所望諸君子敏敏以勸厥成矣